

खास-खास खबरां

1. भारत अरब विदेश मंत्रियों दी दूई बैठक अज्ज नमीं दिल्ली च शुरु।
2. उद्योग दे बपार मंत्री पीयूष गोयल होरें आखेया ऐ जे भारत-यूरोपी संघ मुक्त बपार समझौते कन्ने यूरोपी संघ गी भारत दा निर्यात 5एं बरें च दूना होई सकदा ऐ।
3. मुख्यै च मिट्टी दे नरोएपन सरबंधि 25 करोड़ शा बी मते सॉयल हैल्थ कार्ड करसानें गी बंडे जाई चुके दे न।
4. उपराष्ट्रपति सी.पी. राधाकृष्णन होरें अज्ज फरीदाबाद च 39में सूरजकुंड अंतराष्ट्रीय शिल्प मेले दा उदघाटन कीता।
5. तिरुवनंतपुरम च भारत ते न्यूजीलैंड बश्कार मजूदा श्रृंखला दा 5में ते खीरी टी-20 मैच जारी ऐ।

<><><><><><>

India –Arab

अज्ज नमीं दिल्ली च दपैहरी मगरा भारत-अरब विदेशमंत्रियों मझाटै दूई मीटिंग लग्गी। मीटिंग दी सह-अध्यक्षता भारत ते संयुक्त अरब अमीरात नै कीती। इस मीटिंग च अरब लीग दे मैम्बर मुख्यें ते अरब लीग दे महासचिव होरें हिस्सा लैता। भारत आसेया नमीं दिल्ली च लोआई गेदी एह पैहली भारत-अरब विदेशमंत्रियों दी मीटिंग ही। एदे च पूरे 22एं अरब मुख्यें शिरकत कीती। विदेशमंत्रियों दी इस मीटिंग दे पैहले भारत ते अरब दे सीनियर अधिकारियों दी मीटिंग राष्ट्रीय राजधानी च कल लग्गी ही। साहड़ी संवाददाता नै दस्सेया ऐ जे दूई भारत-अरब विदेशमंत्रियों दी बैठक च आपसी सहयोग भ्याली दे विस्तार दी मेद ऐ। भारत-अरब बंज बपार 240 बिलियन डॉलर पार करी गेदा ऐ।

<><><><><><>

Goel –India EU-FTA

उद्योग ते बपार मंत्री पीयूष गोयल होरें आखेया ऐ जे भारत यूरोपी संघ मुक्त बपार समझौते-एफ.टी.ए कन्ने यूरोपी संघ गी भारत दा निर्यात औंदे 5एं बरें च दूना होई सकदा ऐ। गोयल होरें बपारियों-एम.एस.एम.ई यानि लौहके दरमयाने ते भलेया लौहके उद्यम- स्टार्ट-अपें ते उद्यमियों गी अपने बपार कारोबार दा अंतराष्ट्रीय स्तरें पर विस्तार करने दा आग्रह कीता। प्रमुख राष्ट्रीय अखबारें गी दिते गेदे अपने- इस बारे चेचे इंटरव्यूएं दी श्रृंखला गी सोशल मीडिया पर सांझा करदे होई गोयल होरें आखेया जे एह बपार समझौता भारत गी केंई चाल्ली नै फैयदा पुजाग। गोयल होरें आखेया जे भारत-यूरोपी संघ मुक्त बपार समझौता इक बड़ा गै महत्वपूर्ण करार ऐ- जेहड़ा देश दे संवेदनशील क्षेत्रें दे हितें दी रक्षा करदे होई भारत लेई केंई नमें ते बड्डे मौकें पैदा करोग। उनें

इब्बी दस्सेया जे प्रधानमंत्री नरेन्द्र मोदी हुंदे विश्वास- दूर दी पारखी नजर ते सोच ते मार्ग-दर्शन दे कारण गै इस समझौते गी खीरी शकल दिती जाई सकदी ऐ। उनें आखेया जे एह समझौता भारत दे श्रम प्रधान क्षेत्र लेई सकारात्मक बदलाव ते सुधार आहन्ने च मता कारी दा साबत होग। उनें आखेया जे कुसै बी मुक्त बपार गी खीरी शकल दिंदे होई देसै दे बुनियादी हितें दा पूरा ध्यान रखेया जंदा ऐ ते एह समझौते हितें दी राखी दे कन्नो-कन्नी उत्पादन ते विनिर्माण क्षेत्र गी बी बढ़ावा देग।

<><><><><><>

Amit Shah –W.B

भारतीय जनता पार्टी दे सीनियर लीडर ते गृहमंत्री अमित शाह होरें दोष लाया ऐ जे पच्छिम बंगाल सरकार मतुआ ते नामशुद्र समुदायें गी धमकी देआ रदी ऐ। पच्छिम बंगाल दे उत्तर चौबीस परगना दे बैरकपुर च आनंदपुरी खेड मैदान च श्रमकें दे इक सम्मेलन गी सम्बोधित करदे होई अमति शाह होरें आखेया जे मतुआ ते नामशुद्र समुदाय दे लोकें गी डरने दी कोई लोड नैई ऐ। उनें आखेया जे मतदाता सूचियें दी नमें सिरेया पूरी चाल्ली नजरसानी आहली प्रक्रिया एस.आई.आर दा राज्य सरकार जिन्ना मर्जी विरोध करी लै- एह प्रक्रिया जारी रौहग। उनें आरोप लाया जे राज्य सरकार दा सहयोग नैई थहोने कारण गै बंगलादेश कन्नै लग्गदे इलाकें च तारबंदी नैई कीती जाई सकी। एहदा मतलब एह ऐ जे राज्य सरकार नैई चांहदी जे बन्ने पारा लोकें दा इत्थे औना बंद होए। अमित शाह होरें दक्खन 24 परगना दे नरेन्द्रपुर च नाजिराबाद दे गोदाम च अगग लग्गने आहले मामले दी निरपक्ख जांच करने दी मंग करदे होई आखेया जे एह घटना मजूदा राज्य सरकार दे भ्रष्टाचार दा नतीजा ऐ। इस घटना च 27 लोकें दी मौत होई गई ही। अमित शाह होरें आखेया जे इस हादसे च मरोने आहलें गी लेइयै बी राज्य सरकार सियासत खेड्डा करदी ऐ। उनें आखेया जे इस हादसे च राज्य सरकार दे करीबी लोक शामिल न- इससै करियै सरकार मोमो कम्पनी दे मालक गी अजें तोड़ी गिरफ्तार नैई करी सकी ऐ।

<><><><><><>

NCP Meeting

राष्ट्रवादी कांग्रेस पार्टी एन.सी.पी. दे कार्यकारी अध्यक्ष प्रफुल पटेल ते प्रदेश अध्यक्ष सुनील तटकरे होरें हाल च पूरे होए दे नेता अजीत पवार हुंदी मुम्बई स्थित सरकारी कोठी च अज्ज सुनेत्रा पवार हुंदे नै भेंट कीती। संवाददाता कन्नै गल्लबात करदे होई सुनील तटकरे होरें दस्सेया जे उंदी एह मलाटी विधानसभा बैठक कोला पैहले होई ही। मगरा विधानसभा भवन दफतरें च दपैहरी मगरा लग्गी दी बैठका च सुनेत्रा पवार होरें गी औपचारिक तौरा पर विधान सभा दा नेता चुनेया गया ते उनें महाराष्ट्र दी उपमुख्यमंत्री दे रुपें च संगंध चुक्की। ओ महाराष्ट्र दी पैहली महिला उपमुख्यमंत्री बनी गेइयां न। मुख्यमंत्री देवेन्द्र फडनवीस होरें आखेया ऐ जे महायुक्ति दा नेतृत्व करने आहली बी.जे.पी.- सुर्गवासी अजीत पवार हुंदे परिवार ते उंदी पार्टी आसेया लैते गेदे हर फैसले दा समर्थन करोग। तौंआई एन.सी.पी.-एस.पी. गुट दे प्रमुख शरद पवार होरें दावा कीता ऐ जे उनें अजीत पवार हुंदी घरें आहली सुनेत्रा पवार हुंदे महाराष्ट्र दी उपमुख्यमंत्री दे रुप च संगंध चुक्कने दी खबरें बारे उनेंगी जानकारी नैई ही।

<><><><><><>

Soil Health Card

पूरे मुल्खै च 25 करोड़ शा बी मते मिट्टी दी सेहतू आले सायल हैल्थ कार्ड करसानें गी बंडे गे न। मिट्टी च खनिज तत्वे दी कमी गी ध्यानै च रक्खदे होई- 2015 च सरकारै सायल हैल्थ कार्ड स्कीम चलाई ही। पिच्छले बरे जुलाई म्हीने तक्कर 93 जहार शा मते करसान सिखलाई प्रोग्राम-खेतरे च 6 लक्ख शा मते तुजुबे ते जहारा बद्धे जागरुकता अभियान इस स्कीम तैहत चलाए गे। सरकारै आखेया जे एदे नै स्कीम दी लोके तक्कर पुज्ज दे दायरे बारे पता लग्गदा ऐ। सायल हैल्थ कार्ड दंडु बरे मगरा जारी कीता जंदा ऐ ते एह करसानें गी उंदे खेतरे दी मिट्टी दे खनिज तत्वे दी स्थिति बारे जानकारी दिंदा ऐ।

<><><><><><>

V.P –Surajkund Festival

उपराश्ट्रपति सी.पी. राधाकृष्णन होरें अज्ज हरियाणा दे फरीदाबाद च 39में “सूरजकुंड अंतराश्ट्रीय शिल्प मेला-2026” दा उदघाटन कीता। इस मौके उनें “मेला साथी ऐप” दी बी शुरुआत कीती। इस मौके पर उपराश्ट्रपति होरें आखेया जे देश दे कारीगर सदिये पराने ज्ञान दे सरक्षक न ते उनेंगी सशक्त बनाना इक निग्गर समावेशी ते टिकाऊ अर्थबवस्था दे निर्माण लेई बड़ा लाजमी ऐ। उनें आखेया जे प्रधानमंत्री नरेन्द्र मोदी हुंदे दूरदर्शी नेतृत्व च भारत दी सांस्कृतिक विरासत ते रिवायती दस्तकारी क्षेत्र गी राश्ट्रीय पुर्नजागरण दे केन्द्र च रखेया गेदा ऐ। उपराश्ट्रपति होरें आखेया ऐ जे “प्रधानमंत्री विश्वकर्मा कौशल सम्मान योजना” जनेई पैहल कारीगिरे गी हर चाल्ली दी सहायता-हुनर विकास ते आर्थिक सशक्तिकरण प्रदान करै करदी ऐ। इस बरे दे सुरजकुंड मेले दा विषय सार ऐ- “मकामी थमां कुलसंसारी”- जेहदा मकसद ते मतलब भारत दे मकामी ते ग्रामीण कारीगिरे दे सशक्तिकरण लेई पारम्परिक ग्रामीण कलाएं गी अंतराश्ट्रीय सतह पर पंछान दोआना ऐ। मेला दिक्खने औने आहले दे आकर्षण लेई ऐकती उत्तर-प्रदेश ते मेघालय राज्यें गी इस बरे दी थीम स्टेटस दे रुपै च शामिल कीता गेदा ऐ। सूरजकुंड मेला 15 फरवरी तगर चलोग।

<><><><><><>

PM –Punjab

“संत गुरु रविदास जी” हुंदी 649मीं जयंति दे मौके पर प्रधानमंत्री नरेन्द्र मोदी होर कल पंजाब दा दौरा करगंन। ओ आदमपुर ब्हाई अड्डे दा बी दौरा करगंन- जित्थे इस ब्हाई अड्डे दा नां बदलिये नमां नां आदमपुर “श्री गुरु रविदास जी” ब्हाई अड्डा रखगंन। प्रधानमंत्री हुंदे दफ्तर नै जानकारी दिती ऐ जे आदमपुर ब्हाई अड्डे दा नां बदलिये आदमपुर श्री गुरु रविदास ब्हाई अड्डा करना “श्री गुरु रविदास”- जेहड़े जे इक महानसंत ते समाज सुधारक हे- उन्दे प्रति सम्मान गी दर्शांदा ऐ। श्री गुरु रविदास जी दी समाजी बरोबरी- गरीबें ते कमजोरें प्रति दया ते हमददीं दे हर इक मनुक्ख दे आत्म-सम्मान दियां सिक्खेयां- भारत दे समाजी मुल्ये-कदरें गी सदा थमां प्रेरत करदियां न। प्रधानमंत्री होर लुधियाना दे हलवारा ब्हाई अड्डे पर टर्मिनल भवन दा बी उदघाटन करगंन। एह टर्मिनल भवन राज्य लेई इक नमां प्रवेश द्वार स्थापित करोग- जेहड़ा लुधियाना ते एहदे आहले - दोआले दे औद्योगिक ते राई-बाई क्षेत्रें दिये जरूरतें गी बी पूरा करोग। हलवारा च भारतीय ब्हाई फौज दा रणनीतिक लिहाज कन्ने बड़ा महत्वपूर्ण स्टेशन बी ऐ। पैहले लुधियाना दे पराने ब्हाई अड्डे दा रनवे एहदे मुकाबले लौहका हा- जेहड़ा छड़ा लोहके अकार दे ब्हाई जहाजें लेई माफक हा। ब्हाई सम्पर्क च सुधार ते बड्डे जहाजें दी उत्थे आओ-जाई समयोजित करने लेई- हलवारा च इक

नमां नागरिक एन्कलेव विकसित कीता गया ऐ- जेहदा रणवे शैल लम्मा ऐ ते ए-320 जनेह ज्हाजें दा बी इत्थे उतरना ते डोआरी भरना मुमकिन होई सकदा ऐ। प्रधानमंत्री होर “संत गुरु रविदास जी” जी हुंदे सम्मान च इक सार्वजनिक समारोह च बी हिस्सा लैगंन ते शरदांजलि अर्पत करने लेई डेरा सचखंड बल्लन बी जागंन।

<><><><><><>

Cricket

मर्दे दे क्रिकेट च अंतराश्ट्रीय टी-20 श्रृंखला दे 5में ते खीरी मैच तैहत भारत ते न्यूजीलैंड इस्सलै तिरुवनंतपुरम दे ग्रीन फिल्ड अंतराश्ट्रीय स्टेडियम च मैच खेड्डा करदे न। ए मैच संजा 7 बजे शुरु होआ। भारत नै टॉस जित्तियै पैहले बल्लेबाजी करने दा फैसला लैता। हुनै कोला किश चिर पैहले भारत नै 5 ओवरे च 2 विकट मोआइयै 48 रन्ज बनाई लैते दे हे। भारतीय टीम नै एह श्रृंखला पैहले गै जित्ती लैती दी ऐ। भारत नै पैहले त्रौनें मैचें च उपरोतली मेहमान टीम गी रहाइयै जित दर्ज कीती- जिसलै कि चौथे मैच च उसी 50 रन्ज दी हार दा सामना करने पेया। अज्ज दे मैच कन्नै एह फैसला होग कि भारत श्रृंखला पर जित्त 3-2 कन्नै करदा ऐ जां फही 4-1 कन्नै। तोंआई न्यूजीलैंड दी बी पूरी कोशश ऐ- जे ओ 2026 आहले टी-20 विश्व कप कोला पैहले अपना दिल बधाने लेई श्रृंखला दी समाप्ति जित्त कन्नै करै।

<><><><><><>

HM-IGP

केन्द्र सरकार नै भारतीय पुलिस सेवा-IPS दे एस.पी. ते डी.आई.जी. रैंक दे अफसरें लेई IGP रैंक दी प्रोमोशन कशा पैहले केन्द्र च दंडू बरे दे तुजुर्बे गी लाजमी करी दिता ऐ। केन्द्रीय गृह मंत्रालय नै इत सरबंधै च सब्भनें राज्य सरकारें दे मुख सचिवें गी चिट्ठी लिखियै सूचित करी दिता ऐ। मंत्रालय नै आखेया जे ए निर्देश 2011 बैच शा अगड़े सब्भनें IPS अधिकारियें पर लागू होगंन। इस निर्देश दा मकसद सीनियर अधिकारियें गी केन्द्र च जमीनी स्तह पर मुनासब तुजुर्बे कन्नै लैस करना ऐ।

<><><><><><>

Waqf Properties

सरकार नै वक्फ सम्पतियें दे प्रबंधन गी पारदर्शी ते जवाबदेह बनाने लेई “उम्मीद पोर्टल” पर सर्वेक्षण मॉड्यूल ते वक्फ सम्पति पट्टा मॉड्यूल शुरु कीता ऐ। अल्पसंख्यक मामले सरबंधि मंत्रालय नै जानकारी दिती ऐ जे सर्वेक्षण मॉड्यूल पोर्टल पर वक्फ सम्पतियें दे सर्वेक्षण सरबंधि जानकारी गी कठेरने- उसी कम्पाइल करने ते संजोइयै रखने लेई डिजिटल ांचा उपलब्ध करांदा ऐ। वक्फ सम्पति पट्टा प्रबंधन मॉड्यूल गी वक्फ सम्पतियें दी पट्टा सरबंधी जानकारी दे पूरे-पराते प्रबंधन गी सैहल सखल्ला बनाने दे मकसद कन्नै शुरु कीता गया ऐ। एह मॉड्यूल पट्टा जानकारी- अवधि यानि पट्टे दी मयाद- रकम ते होर दुए जरुरी ब्यौरे गी बवस्था आहले ते पारदर्शी ांगै नै दर्ज करने ते निगरानी करने च सक्षम बनांदा ऐ। अल्पसंख्यक मामले दे सचिव डाक्टर चन्द्रशेखर कुमार होरें सब्भनें राज्यें ते केन्द्र शासत प्रदेशें दे वक्फ बोर्ड गी इनें मॉड्यूल दे संचालन गी यकीनी बनाने लेई ते हितधारकें च जागरुकता बधाने लेई प्रोत्साहित कीता ऐ।

<><><><><><>

Cummins-Ruled Out

आस्ट्रेलिया दे तेज गेंदबाज पैट कमिंस पिट्ठ च सट्ट लग्गने कारण अँदे ICC T-20 विश्व कप शा बाहर होई गेन। एह टूर्नामेंट 7 फरवरी थमां 8 मार्च तोड़ी भारत ते श्रीलंका च आयोजित कीता जाहग। मिशेल मार्श गी उंदी थाहर आस्ट्रेलिया दा कप्तान बनाया गया ऐ। बेन इवार्शियस ते मैथ्यू रेनशा गी 15 मिम्बरी आस्ट्रेलिया टीम च शामिल कीता गया ऐ- जिसलै जे मैथ्यू शार्ट गी टीम शा बाहर करी दिता गया ऐ। आस्ट्रेलिया गी ग्रुप-बी च आयरलैंड- जिम्बाब्वे- श्रीलंका ते ओमान कन्नै रखेया गया ऐ। टीम 11 फरवरी गी कोलम्बो च आयरलैंड कन्नै अपना पैहला मैच खेडग।

<><><><><><>

Encounter Dolgam

जम्मू -कश्मीर केन्द्र शासत प्रदेश दे किश्तवाड़ जिले दे छातरु इलाके दे डोलगाम च अज्ज बड्डलै सुरक्षाबलें ते आतंकवादियें बश्कार टाकरा शुरु होआ। इक सोशल मीडिया पोस्ट च व्हाईट नाइट कोर नै आखेया ऐ जे जारी सांझे अभियान दौरान आतंकवादियें कन्नै सम्पर्क परतियै कायम होई गया ऐ। सुरक्षाबलें इलाके दी घेराबंदी करी लैती ऐ ते कारवाई अजें जारी ऐ। होर ब्यौरे गी बलगेया जा करदा ऐ। ध्यानजोग ऐ जे सुरक्षाबलें जैश-ए-मोहम्मद दे व्रंऊ आतंकवादियें दा पता लाने लेई बर्फू कन्नै खटोए दे छातरु इलाके च चला रदे आतंकवाद रोधी अभियान गी कल होर तेज करी दिता हा। 18 जनवरी गी शुरु कीते गेदे इस अभियान च अंदू थमां केई टाकरे होई चुके दे न।

<><><><><><>